

Nuwe Lied Bediening



Hy het 'n nuwe lied in my mond gegee, 'n lofprijsing tot ons God sodat baie dit sal sien en respekvol vrees en op Yahuah vertrou. Ps.40:3.

Purim – Die Fees van Ester

Beide *Hanukkah*¹ en *Purim* is feeste wat wel in die bladsye van die Skrifte gevind word, maar is egter nie deel van die feestye (vasgestelde tye) van יהוה soos ondermeer in Levitikus 23 opgeteken is nie. Daarom is dit nodig om oor die viering van hierdie feeste te besin, asook om te besin oor die betekenis daarvan en oor die plek wat dit in ons geloofslewe behoort in te neem.

Beide *Hanukkah* en *Purim* is geskiedkundige gebeure waar Yisra'el uitwissing in die gesig gestaar het, maar deur יהוה op 'n bonatuurlike wyse gered was. Dit opsigself is rede om hierdie gebeure op gepaste wyse in herinnering te roep, maar nie as deel van die feestye van יהוה nie.

Die gebeure wat aanleiding gegee het tot die instelling van *Hanukkah* gaan terug na die jaar 171 voor dié Gesalfde Een toe Antiochus IV, ook bekend as Antiochus Epifanus, die regeerder van Sirië en Judea geword het. Antiochus het aan homself die naam Epifanus, wat “god gemanifisteer” beteken, gegee, want hy het homself beskou as die god wat oorhoofs oor al die gode is. Hy wou eenheid in sy ryk bewerkstellig deur 'n Helenistiese (Griekse) kultuur te vestig en hy het die Hebreeuse (Joodse) geloof en kultuur as die struikelblok in die weg hiervan gesien en het gevolglik die Y'udahiete (Jode) onderdruk en vervolg deur hulle te verbied om hulle geloof uit te leef. Antiochus wou nie die Y'udahiete fisies uitwis nie, maar hy wou hulle dwing om sodanig met die Griekse kultuur vermeng te raak dat hulle Hebreeuse (Joodse) identiteit totaal verlore sou gaan en hulle nie meer יהוה, die God van Avraham, Yitz'gak en Ya'akov sou dien nie.

Die gebeure wat aanleiding gegee het tot die jaarlikse herdenking van *Purim*, verskil van die van *Hanukkah* in die opsig dat die Y'udahiete fisiese uitwissing in die gesig gestaar het. Later meer hieroor.

Onthou: Satan se doelwit deur die eeue is om van die God van Yisra'el “ontslae” te raak deur יהוה se ware outoriteit, karakter en hoedanighede verkeerdelik weer te gee (te verdraai) op 'n wyse dat mense dit sal glo en, tweedens, om Yisra'el en יהוה se volk fisies te vernietig!! Met die gebeure aangaande *Hanukkah* wou Satan die God van Yisra'el “vernietig” het deur Sy Naam uit te wis sodat Yisra'el nie meer die ware Lewende God sou ken nie, terwyl met die gebeure aangaande *Purim* wou Satan vir Yisra'el fisies uitgewis het. Hierdie patroon is deur die eeue herhaal. Dink maar aan al die gebeure waar daar gepoog is om die Y'udahiete (Yisra'el) uit te wis, hetsy deur fisiese uitwissing of

¹ Hanukkah–Fees van Ligte:Herbesin:

<http://nuwelied.info/wp-content/uploads/2018/11/GB.Des19HanukkahHersien3.pdf>

gedwonge vermenging met ander groepe en kulture. Die uitwissing van sowat 6 miljoen Y'udahiete gedurende die Tweede Wêreldoorlog is nog vars in ons geheue! Die psalmdigter het reeds eeue gelede hierdie profetiese woorde gespreek:

4 Hulle het gesê: “Kom, laat ons hulle vernietig vanuit tussen die nasies sodat die naam van Yisra’el nie meer onthou word nie,
5 want hulle het saamgestem met een verstand, wil en emosie; hulle het saamgestaan teen U. Ps. 83:4-5²

Satan doen alles moontlik om te verhinder dat mense יהוה, die God van Avraham, Yitz’gak en Yaákov waarlik kan ken. Selfs Christene se ongehoorsaamheid spruit uit hulle onkunde van die enigste Ware Lewende God, יהוה, en van Sy Karakter en Outoriteit (Naam). Ons Vader belowe egter dat ons Hom en Yeshua persoonlik kan **ken** (Mat 11:27; Joh. 14:7; Joh. 17:3; Heb. 8:10 en 11; 1 Joh. 5:20). Dit is belangrik om יהוה te ken, want Hy sal diegene wat Hy **nie ken nie**, weg wys van die deur van die Koninkryk. (Matt. 7:21 tot 24; Matt. 25:12; Luk. 13:25). Ons moet strewende om יהוה, ons God en Vader, te ken, maar dit is nog meer belangrik om seker te maak dat Hy ons as studentevolgelinge van van Sy Seun, ken!!

Vandag sien ons dat geskiedkundige gebeure besig is om herhaal te word. Ons is almal bewus van die feit dat Iran (antieke Persië) en sy Moslem bondgenote daarop uit is om Yisra’el te vernietig! Gaan die gebeure wat aanleiding gegee het tot die instelling van *Purim* in ons leeftyd herhaal word? Is die Iranese leiers, asook ander Moslemsleiers en vyande van Yisra’el, die hedendaagse Haman? Die vraag is dan ook: Wie is bereid om soos Ester en Mordekhai (Mordegai) hulle lewens te waag om openlik vir Yisra’el³ in te tree en te ondersteun?

***Purim* – Die Fees van Ester**

In die boek van Ester lees ons die volgende:

¹ In die twaalfde maand, dit is die maand Adar, op die dertiende van die maand, toe die bevel van die koning en sy wet uitgevoer sou word, op die dag dat die vyande van die Y'udahiete gehoop het om hulle te oorweldig, alhoewel die bevelskrif tot die teenoorgestelde gedraai is sodat die Y'udahiete oor hulle haters sou heers,
² het die Y'udahiete saamgekom in hulle stede in al die provinsies van koning Agashverosh om hulle aan te val wat hul skade soek en niemand kon hulle weerstaan nie, want vrees vir hulle het op al die volke geval. Ester 9:1-2.

²⁰ Mordekhai het hierdie dinge neergeskryf en briewe gestuur aan al die Y'udahiete wat in al die provinsies van koning Agashverosh was, naby en ver,
²¹ om ooreen te kom dat hulle die veertiende dag en die vyftiende dag van die maand Adar jaarliks moet vier

² Alle teksverwysings is geneem uit PWL (Pad van Waarheid tot die Lewe) Vertaling (www.padwlewe.ch), behalwe waar anders vermeld. Om ‘n kopie van die Bybel te bekom kan Gerrie Coetzee per e-pos by gerrie@padwlewe.ch gekontak word of telefonies by 074 361 2134.

³ Daar is die fisiese en die geestelike Yisra’el en beide het gemeenskaplike vyande!

22 as die dae waarop die Y'udahiete gerus het van hulle vyande en die maand wat vir hulle van smart tot vreugde en van rou tot 'n feesdag verander is en dat hulle dit dae van feesviering en vreugde moet maak en porsies kos vir mekaar stuur en geskenke vir die armes.

23 Die Y'udahiete het dit aanvaar om te doen soos hulle begin het en soos Mordekhai vir hulle geskryf het,

24 want Haman, die seun van Hammedatha, die Agagiet, vyand van almal van Y'udah, het beplan om hulle uit te roei en het die lot (pur) gewerp om hulle te vernietig en uit te roei.

25 Toe Ester voor die koning gekom het, het hy laat neerskryf: “Laat die bose plan wat teen die Y'udahiete gesmee is, terugkeer op die kop van hom wat hulle beplan het en laat hy en sy seuns aan die galg opgehang word” Ester 9:20-25

Die woord *Purim* is afkomstig van die woord *pur* en beteken “lot, lotery en om die lot te werp (Rig. 9:24 en 26), want die dag waarop Haman die Y'udahiete wou uitroei is bepaal deur die lot te werp (Est. 3:7 tot 13). Daarom is hierdie fees ook bekend as die Fees van Lotgevalle (*Feast of Lots*), maar meer algemeen bekend as die Fees van Ester.

Purim word volgens die Joodse burgerlike kalender jaarliks op die 14 van Adar gevier. Volgens die Gregoriese kalender is hierdie feesdag gewoonlik gedurende Maart, maar soms ook teen laat Februarie. Aangesien *Purim* altyd een maand voor Pesag gevier word, sal dit in 'n skrikkeljaar in die dertiende maad, naamlik die tweede Adar-maad, gevier word.

Purim word op die 14 Adar gevier, want die 13e (die dag wat Haman die Y'udahiete wou uitwis – Ester 3:13) word beskou as die dag wat die “veldslag” (geveg) plaasgevind het. Die oorwinning is dus op die 14e aangekondig. Die 15 van Adar word as *Shushan Purim* gevier op grond daarvan dat in die ommuurde stad *Shushan* (Susan) waar koning Ahasveros gewoon het, was die oorwinning eers een dag later behaal.

Soos reeds genoem is *Purim*, net soos *Hanukkah*, nie een van die vasgestelde tye (feestyte; *mo'edim*) wat volgens Levitikus 23 deur יהוה ingestel is nie en daarom kan dit nie beskou word as 'n “amptelike” afspraak met die Vader nie. Dit het egter 'n geskiedkundige oorsprong en daar word wel in die Skrifte na hierdie fees verwys. Beide *Purim* en *Hanukkah* word jaarliks gevier op grond van hierdie belangrike gebeure wat Yisra'el se geskiedenis beïnvloed het, en waarskynlik ook die geskiedenis van die wêreld.

Die feit dat *Purim* nie Torah (die eerste vyf boeke van Moses) gefundeer is nie, laat by sommige die vraag of hierdie fees hoegenaamd gevier behoort te word? Die doel van hierdie skrywe is nie noodwendig om uitsluitel oor die saak te probeer gee nie, of om voorskriftelik te wees nie, maar om wel sekere feite aangaande die gebeure wat aanleiding gegee het tot die instelling van hierdie fees kortliks te bespreek en in die lig daarvan 'n ingeligde besluit te kan neem oor hierdie fees.

Hoewel יהוה ons Vader nie Sy kinders (Yisra'el) beveel het om hierdie fees te gedenk nie, moet ons egter eweneens besef dat hierdie fees ingestel is na aanleiding van 'n geskiedkundige gebeurtenis wat weer in die eindtye herhaal gaan word. Diegene wat

Torah bestudeer sal weet dat in Torah, maar ook deurgaans in die Woord van יהוה, word daar 'n patroon ('n heenwysing, skadubeeld) gevestig wat herhaal sal word. Soos dit in Jesaja duidelik gestel word, naamlik dat die einde deur die begin bekend gemaak sal word.

⁹ Onthou die dinge wat van ouds af was, want Ek is God en daar is geen ander nie; Ek is God en daar is niemand soos Ek nie;
¹⁰ wat van die begin af die einde verklaar en van die ou tyd af dinge wat nog nie gedoen is nie; wat sê: 'My plan sal stand hou en Ek sal al My begeertes uitvoer. Jes. 46:9-10.

Shaúl herinner ons ook aan hierdie waarheid:

Al hierdie dinge het gebeur as voorbeeld vir ons en is opgeskryf as 'n waarskuwing aan ons, want die einde van die wêreld het by ons aangekom. 1Kor. 10:11.

Soos reeds genoem, sal die geskiedkundige gebeure wat tot die instelling van *Purim* aanleiding gegee het, weer in die laaste dae herhaal word. Soos in die dae van Ester en Mordekhai sal יהוה weer gedurende eindtydgebeure tot die redding van Sy uitverkore volk kom – selfs al sal Yisra'el soos van ouds ontrou wees en almal nie na die beloofde land teruggekeer het nie. *Purim* dien dus ook as een van die waarskuwings aan ons op wie die eindes van die eeue gekom het. Dit is egter ook 'n bemoedigende herinnering dat יהוה, die Almagtige, in beheer is en dat alles volgens Sy Raadsplan sal geskied.

Purim is dus as 'n herinnering van יהוה se genade en van Sy plan van herstel van Yisra'el. Is hierdie dan nie genoegsame rede waarom hierdie gebeurtenis gedenk behoort te word nie? Dit herinner ons aan wat gebeur het en is 'n voorbeeld en waarskuwing aan ons op wie die eindes van die wêreld gekom het. *Purim* is ryk aan geestelike lesse waaruit ons kan leer en, derhalwe, rede om dit jaarliks op gepaste wyse te herdenk en in ons lewens toe te pas.

Van al die Joodse feeste is *Purim* die vrolikste. Dit is die herdenking van 'n tyd toe die Y'hudahiete wat in Persië gebly het van uitwissing gered was. Die helde in die storie is Ester (Hadassa – Est.2:7) en haar neef Mordekhai. Laat ons egter eers die gebeure wat aanleiding tot die instelling van *Purim* gegee het, kortliks bespreek.

Die Geskiedenis

Hierdie gedeelte van Yisra'el se geskiedenis het in antieke Persië, wat vandag bekend is as Iran, tydens die koningskap van Agashverosh, ook bekend as Xerxus I (486 tot 465 voor Yeshua), plaasgevind. Dit was ook in die tyd kort nadat 'n klein gedeelte van die Y'hudahiete wat in ballingskap in Persië was, met die toestemming van koning Koresh, die voorganger van Ahasveros, na Yisra'el teruggekeer het om die tempel te herbou (Esra 1:1-4).

Die boek van Ester gee vir ons ‘n volledige vertelling van die geskiedkundige gebeure wat uiteindelik tot die instelling van *Purim* aanleiding gegee het. Baie kortliks kan die hele boek soos volg opgesom word:

Ester, ‘n skoonheid van Hebreeuse herkoms, en wat deur koning Agashverosh as sy nuwe koningin in die plek van koningin Vashti gekies was, het die Y’udahiete met die hulp van Mordekhai van gewisse uitwissing gered deur die komplot van die onderduimse en arrogante Haman, om al die Y’udahiete op ‘n bepaalde datum dood te maak, aan Agashverosh bloot te lê. Op grond hiervan het Agashverosh ten gunste van die Y’udahiete besluit en het Haman aan die galg, wat vir Mordekhai bestem was, gesterf. Mordekhai is in die plek deur Agashverosh aangestel en na aanleiding van hierdie reddende genade van יהוה, is die jaarlikse fees van *Purim* (Fees van Ester) ingestel.

Die helde in hierdie gebeure is eerstens Ester wat haar lewe gewaag het om sonder uitnodiging na koning Agashverosh te gaan en hom, asook Haman, na ‘n feesmaal te nooi waartydens sy die komplot van Haman teen die Y’udahiete bekend gemaak het. Die ander held in die verhaal is Mordekhai, die neef van Ester, wat openlik die gesag en bevel van Haman verontagsaam het en aan Ester die nodige ondersteuning gebied het om haar taak uit te voer. Mordekhai is ook die een wat met ware berou (*Teshuva*) hom voor יהוה verootmoedig het en al die ander Y’udahiete aangemoedig het om dieselfde te doen.

Sekerlik het beide Ester en Mordekhai besef dat die grondliggende oorsaak van hul benarde situasie toe te skryf is aan die ongehoorsaamheid van die gedeelte van die volk in Persië wat nie na die beloofde land, Yisra’el, teruggekeer het nie. Was dit nie ondermeer die rede vir die drie dae vas van Ester, Mordekhai en van die volk nie (Est. 4:16)?

Hierdie geskiedenis is maar net deel van die vele handeling van יהוה met sy volk. Dit is weereens bewys dat יהוה getrou bly al is Sy bruid, Sy uitverkore koninklike priesterdom, ontrou. *Purim* is die bevestiging dat יהוה se genade vir ewig sal bestaan en toeganklik sal bly vir elkeen wat met ware berou tot God nader. Soos iemand dit gestel het: *There may be a thousand good reasons for two people not to marry. But true love overcomes them all. Indeed, true love is why God still cares for us, and why we still care for Him.*

Haman was ‘n afstammeling van die antisemitiese Amalekiete wat daarop uit was om die “probleem van die Y’udahiete” op te los deur hulle uit te wis. Hierdie Y’udahiete-haat was op etniese groepering gebaseer en was deur die eeue verskeie keer herhaal en is steeds vandag die wortel van alle haat teen Yisra’el en enige een wat met Yisra’el en die Y’udahiete medelye het. Haman se Y’udahiete-haat het ondermeer gespruit uit die feit dat die Y’udahiete se wette anders was as die van enige volk hoewel hulle die landswette ook gehoorsaam het:

⁷ In die eerste maand, dit is die maand Nisan, in die twaalfde jaar van koning Agashverosh, het hulle die lot voor Haman gewerp vir elke dag en vir elke maand. Toe op die twaalfde maand, dit is die maand Adar,

⁸ sê Haman vir koning Agashverosh: “Daar is ‘n sekere volk wat verstrooid en afgesonderd is tussen die volke in al die provinsies van koning Agashverosh en

hulle wette is anders as dié van enige ander volk en hulle hou nie die wette van die koning nie; daarom moet die koning hulle nie spaar nie. Est. 3:7-8.

Die leuen wat Haman verkondig het, is ook by herhaling deur die eeue verkondig en is grootliks die rede vir die haat teenoor יהוה se volk. Antisemitisme se oorsprong is dus etnies, asook omrede die Y’hudahiete, en die nie-Y’hudahiete wat op die mak olyfboom ingeënt is, ook ander wette as landswette gehoorsaam. Hulle andersheid is te vinde in Torahgehoorsaamheid. Dit is ‘n gees van Haman (Amalek) wat in elkeen heers wat Y’hudahiete haat. Ons kan waarlik sê: Profesie is geskiedenis in wording en die einde sal deur die begin bekend gemaak word. Antisemitisme is wêreldwyd aan die toeneem en word selfs in die kerk gevind. *Purim* herinner ons ook aan hierdie werklikheid!!

Die boek van Ester is ook die enigste boek in die Skrifte waar die Naam van die Almagtige nie voorkom nie of waar daar geen direkte verwysing na יהוה is nie⁴. Ook hierdie is die bewys dat יהוה soms “agter die skerms werk om Sy doel en plan uit te voer” op wyses wat ons nie altyd besef of verstaan nie. Waarlik, יהוה is ons God en Vader van genade!! Hy is in beheer!

Die Magtige God is nie ’n man dat Hy sou lieg nie, of ’n mensekind dat Hy jammer sal wees nie. Het Hy gesê en sal dit nie doen nie, of het Hy gepraat en sal dit nie waar maak nie? Num. 23:19.

Wat Leer *Purim* Ons?

Die gebeure rondom *Purim* is ryk aan geestelike betekenis. Ons kan ook baie leer uit die karakters en gesindhede van die hoofrolspelers van hierdie geskiedkundige drama. Dit is veral Ester wat die aandag aangryp.

Ons weet dat volgens Hebreeuse kultuur het ‘n naam ‘n bepaalde betekenis. Die Naam Ester is van Persiese oorsprong en beteken waarskynlik *ster*, maar haar Hebreeuse naam is *Hadassa* wat *mirtbessie* (*myrtle*) beteken. Die mirtbessiebos is een van die vier plantspesies van die *lulav* wat tydens Sukkot (Fees van Tabernakels) as loffer gewuif word. Simbolies verteenwoordig die mirtbessie die oë van ‘n persoon.

Daarom word gesê dat Ester nie net die uiterlike dinge opgemerk het nie, maar dat sy ook die innerlike en die verskuilde kon “sien” [Volgens sommige bronne is die oorsprong van die naam van Ester afkomstig vanaf die Hebreeuse woord *saiter* wat *verborgenheid* beteken]. Ester kon met die oë van יהוה die onsiglike sien. Dit het meegebring dat Ester oor ‘n innerlike sterkte en vertroue beskik het wat haar bereidwillig gemaak het om selfs haar lewe op te offer vir ‘n saak van geregtigheid. Sy was ‘n loffer (‘n mirtbessie) wat voor יהוה gewuif was in die dae toe Yisra’el uit die hand van Haman gered was. Is dit nie hoe ons ook behoort te wees nie, naamlik om verby die sigbare te kyk en met vertroue in יהוה deur die onverdiende guns in Yeshua die onsigbare raak te sien wat van ons

⁴ Sommige is juis om hierdie rede van mening dat die boek van Ester nie deel van die Skrifte moet wees nie.

bereidwillige diensknegte van יהוה maak? Is ons soos mirtbessies deel van die lofoffer voor God?

Ester was 'n dapper vrou wat nie gehuiwer het om standpunt teen die bose in te neem nie. Sy het dit egter met die regte gesindheid (1Pet. 3:1-4) deur vas en gebed gedoen en sonder om te skroom om die waarheid te openbaar.

Dit was nie net Ester wat haar lewe gewaag het nie, maar ook Mordekhai. Hy was bereid om openlik te weier om sy knie voor Haman te buig (Ester 5:9) al kon dit sy dood beteken. Mordekhai het ook die voorbeeld gestel deur openlik berou van sak en as, en baie van die Y'udahiete het sy voorbeeld gevolg (Ester 4:1-3). Is ons bereid om soos 'n Mordekhai ons voor God sigbaar en hoorbaar te verootmoedig, veral vir 'n saak waar ons medemens die lydende party is?

Die les wat ons uit die optrede van beide Ester en Mordekhai leer, is dat ons bereid moet wees om ons lewens te waag vir die Koninkryk van יהוה. Hoewel ons 'n koninklike priesterdom is (1 Pet. 2:9), kan ons nie verwag om gepamperlang te word nie, want ons is immers ook krygsmanne, atlete en landbouers (2Tim. 2:3-6) wat in 'n geestelike oorlog gewikkel is (Ef. 6:12). Om krygsman, atleet en landbouer te wees vereis egter opoffering, toegewydheid en harde werk.

Soos Ester is ons ook geroep vir hierdie taak. Indien ons nie bereid is om vir die Koninkryk te waag nie, sal יהוה wel iemand anders kry, terwyl ons die gevolge van ons stilswye en waagloosheid sal moet dra (Ester 4:14).

Purim leer ons ook dat יהוה 'n God van wonderwerke is. Daar is die duidelike sigbare wonderwerke waar יהוה Homself prominent openbaar, soos byvoorbeeld Pesag. Dan is daar die wonderwerke waar יהוה verskuil is, soos *Purim*. Beide is die werking van die Almagtige. Ons is egter geneig om op die "sigbare" wonderwerke te fokus en die "verskuilde" wonderwerke te vergeet. Is ons alledaagse lewe nie ook 'n wonderwerk nie? Weet ons regtig by hoeveel geleenthede Vader "agter die skerms" en sonder ons bewuswording 'n wonderwerk in ons lewens doen? *Purim* is 'n herinnering hieraan!! Satan is voortdurend besig om die lot te werp om 'n dag te bepaal om van jou te steel, te slag en te verwoes, maar Yeshua het gekom dat jy lewe in oorfloed kan hê (Joh. 10:10). Is elke dag nie rede tot feesviering nie? Elke dag getuig van ons Vader se redende genade!!

Die Y'udahiete wat in Persië agter gebly het nadat koning Koresh toestemming gegee het dat hulle na Yerushalayim kan terugkeer, het begin vermeng met die Persiese kultuur en leefwyse. Hulle het voorspoed ervaar, maar het die belofte van die beloofde land vergeet. Materialisme het die oorhand begin kry. Is dit nie die gevaar wat ons elkeen in die gesig staar nie? Vergeet ons nie te maklik ons roeping en eindbestemming nie? Soms kos dit 'n Haman om ons uit ons slaap wakker te maak!

Haman is 'n afbeelding van elkeen wat gedryf deur antisemitisme die uitwissing van Yisra'el (die Y'udahiete) beplan of op enige wyse die volk van יהוה te nakom. Dit wat Haman beplan het, het toe die lot van hom en sy huisgesin geword. Daarom dien Haman

as waarskuwing en herinnering dat יהוה vir ewig getrou bly aan Sy belofte aan Avraham: “En Ek sal diegene seën wat jou seën, en hom vervloek wat jou vervloek” (Gen. 12:3). Elkeen wat glo in Yeshua as dié Gesalfde Een is die nageslag van Avraham (Gal. 3:7), en diegene wat die nageslag van Avraham vervloek (verfoei, verafsku) sal uiteindelik die oordeel van Haman ontvang. Mag יהוה ook in hierdie tye sy volk spoedig verlos van die hedendaagse Hamans!!

‘n Verskuilde vorm van antisemitisme word in die kerk gevind deurdat sommige verklaar dat die kerk Yisra’el vervang het. Aan die ander kant van die skaal is daar diegene wat verklaar dat hulle as die verlore stamme die ware Yisra’el is en nie die Y’hudahiete wat huidig in Yisra’el is nie, en daarom glo hulle dat hulle moet terugkeer (*aliyah*) na Yisra’el. Beide groepe openbaar die gees van Haman.

Purim is ook ‘n waarskuwing teen die gees van Haman wat niks anders is as om selfondergang te bewerkstellig nie. Ons as nie-Y’hudahiete is ingeënt op die mak olyfboom. Ons “vervang” nie die Y’hudahiete nie en ons voorouers is nie noodwendig Y’hudahiete van die tien stamme wat “verlore geraak” het nie. Ons harte klop in ritme met die Vaderhart, want die land Yisra’el en die volk Yisra’el is Sy eiendom! *Purim* herinner ons aan hierdie waarheid!

Wyse Wat *Purim* Gevier Word

Die Joodse kultuur (Judaïsme) is ryk aan simboliek en tradisies. Deur die eeue is daar baie simboliek en tradisies byvoeg wat ook in die hedendaagse viering van *Purim* voorkom. Die oorsprong hiervan is nie altyd bekend nie, en sommige behoort ernstig bevraagteken te word. So byvoorbeeld is dit volgens die Talmud “toelaatbaar” om tydens die eet van die *Purim* feesmaal soveel wyn te drink dat daar nie meer onderskei kan word tussen geseënd is Mordekhai en vervloek is Haman nie. Daar is egter ander tradisies wat as Skriftuurlik beskou kan word en wat meer gepas is om uit vrye wil te volg. Die bekendste is die volgende:


Die eet van ‘n feesmaal saam met familie en vriende is bo aan die lys! Dit staan bekend as *Se’udah* – deelname aan ‘n feesmaal (Ester 9:22).

‘n Feestelike, en dikwels ‘n karnaval-tipe atmosfeer is ook kenmerkend van die viering van *Purim* en kinders neem graag deel hieraan.

Sommige Y’hudahiete vas die dag voor *Purim* (13 van Adar). Dit staan bekend as die vas van Ester toe sy haarself voorberei het om haar lewe te waag om na koning Agashverosh te gaan en sy, en die volk, vir drie dae gevas het (Ester 4:16). Onthou sy kon net gaan op uitnodiging van die koning, andersins kon dit haar lewe gekos het!

Die lees van die *Megillah* (Boek van Ester) is die belangrikste van hierdie feesdag. Daar is vyf boeke in die Skrifte wat as *Megillah* bekend staan, naamlik: Ester, Rut, Klaagliedere, Prediker en Hooglied. Gewoonlik word na Ester verwys as die *Megillah*.

Tydens die lees van die *Megillah* word daar geraas gemaak telkens wanneer Haman se naam genoem word. Dit word gedoen deur die voete te stamp, hom uit te jou of met die hulp van 'n *greggor* of met enige iets wat lawaai maak. Die bedoeling is om Haman se naam uit te wis.



'n *Greggor* (*rattle*; rammelaar; "geraasmaker")

Die gee van lekkernye aan mekaar en aan die behoeftiges is ook deel van die tradisie van *Purim*. Hierdie gebruik staan bekend as *shalach manos* en die letterlike betekenis daarvan is "die stuur van porsies". Een van die bekende lekkernye tydens hierdie feestyd is 'n driehoekvormige koekie met vrugte gevul bekend as *hamentaschen*. Letterlik beteken dit "Haman se sakke" (vol geld!), maar dit verwys ook na Haman se driehoekvormige hoed en ook na sy ore.

Uiteraard is *Purim* nie 'n Shabbat nie, hoewel sommige glo dat geen werk gedoen moet word nie uit eerbetoon vir hierdie geskiedkundige gebeurtenis.

Opsomming en Gevolgtrekking

Die besluit om *Purim* te gedenk of nie word bepaal of geglo word dat die boek van Ester deel is van die Tanakh (ou testament). Diegene wat die boek van Ester se geloofwaardigheid betwyfel, is ook meestal diegene wat die viering van *Purim* sal bevraagteken. Indien jy egter glo dat die boek van Ester deel is van die Tanakh, en indien jy, soos ek, 'n getuienis het dat Vader יהוה jou lewe gespaar het toe jy soos Yisra'el van ouds in ongehoorsaamheid aan Torah geleef het, dan sal jy graag *Purim* wil gedenk. Jy sal dit doen in die wete dat dit nie deel is van die Vader se vasgestelde tye nie, maar jy sal dit wil doen vanweë die geestelike en persoonlike betekenis wat dit vir jou het en omrede jy 'n liefde vir Yisra'el en die Y'udahiete het.

Ja, ons as gelowiges wat weet dat Yeshua dié Gesalfde Een is wat reeds gekom het, hoef nie *Purim* te vier nie en ook nie op die wyse wat Judaïsme dit vandag doen nie. Dit is byvoorbeeld nie nodig om ons vreugde deur oordadige gebruik van wyn aan te help nie, want ons vreugde is Yeshua, dié Gesalfde Een. Ons kan wel ons vreugde en dankbaarheid teenoor יהוה op verskillende wyses sigbaar demonstreer.

Ons medelye en openlike ondersteuning van Yisra'el is waarskynlik die belangrikste wyse hoe ons *Purim* kan gedenk. Is *Purim* nie juis die geleentheid om vir die Y'udahiete in te tree dat die sluier van hulle weggeneem sal word sodat hulle die groter heerlijkheid van die gekruisigde en opgestane Yeshua sal sien nie – 'n heerlijkheid groter as die geskrewe Torah. Yeshua is immers die vleesgeworde Torah en die ware verlossing van

Yisra'el!! Dit is 'n belofte van יהוה wat waarskynlik in ons leeftyd vervul gaan word. Ons is deel van Yisra'el! Mag Purim ons ook hieraan herinner!

Kan jy en ek bekostig om *Purim* stilswyend te laat verbygaan? Is ons nie juis vir 'n tyd soos hierdie deur die Koning van konings gekies om tot die geestelike stryd teen die Hamans van hierdie eeu toe te tree nie?

13 Toe sê Mordekhai vir hom om Ester te antwoord: “Moenie by jouself dink dat jy, meer as die ander van Y'udah, sal ontsnap omdat jy in die koning se huis is nie, 14 want as jy heeltemal stilbly in hierdie tyd, sal daar verligting en redding vir hulle van Y'udah vanaf 'n ander plek kom, maar jy en jou vader se huis sal vernietig word en wie weet of jy nie geroep was om na die koninkryk te kom vir 'n tyd soos hierdie nie?” Ester 4:13-14.

Purim is die geleentheid om fees te vier omrede ons Yisra'el is. En wanneer die vervolging kom en die gees van Haman in die vals gesalfde (antimessias) manifesteer, dan kan ons opkyk in die wete dat ons verlossing naby is (Jak. 5:8). Die keer sal Yeshua self ons uit die hand van “Haman” red.

-0-0-0-0-0-0-0-0-

Ontvang יהוה se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shalom.
Johan.

Epos: kontak@nuwelielied.info
Webwerf: <http://www.nuwelielied.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.